

四庫全書

集部

欽定四庫全書

臨川文集卷十七

宋 王安石 撰

律詩

七言八句

歲晚懷古

段約之園亭

又段氏園亭

回橈

酴醾金沙二花合發

次韻公闢正議書公戲語申之以祝助發一笑

次韻致遠木人洲二首

次韻龔深甫二首

次葉致遠韻

次韻酬朱昌叔五首

次韻送程給事知越州

次韻酬徐仲元

詩奉送覺之奉使東川

次韻奉酬覺之

送程公闢得謝歸姑蘇

送項判官

次韻張德甫奉議

北山三詠

寶公塔

覺海方丈

道光泉

登寶公塔

重登寶公塔復用前韻二首

紙暖閣

雨花臺

北牕

小姑

榮上人遽欲歸以詩留之

呈陳和叔并序

招呂望之使君

公闢枉道見過獲聞新詩因叙歎仰

全椒張公有詩在北山西菴僧者壘之悵然有感

嶺雲

蓼蟲

莫疑

歲晚懷古

先生歲晚事田園魯叟遺書廢討論問訊桑麻憐已長
按行松菊喜猶存農人調笑追尋壑稚子歡呼出候門
遙謝載醪祛惑者吾今欲辯已忘言

段約之園亭

愛公池館得忘機初日留連至落暉
菱暖紫鱗跳復沒柳陰黃鳥轉還飛
徑無凡草唯生竹盤有嘉蔬不采薇
勝事閬州雖或有終非吾土豈如歸

又段氏園亭

欵眠隨水轉東垣一點炊烟映水昏
漫漫芙蓉難覓路
脩脩楊柳獨知門青山呈露新如染
白鳥嬉游靜不煩
朱雀航邊今有此可能搖蕩武陵源

回橈

柴荆散策靜涼颺隱几扁舟白下潮
紫磨月輪升靄靄
帝青雲幕卷寥寥數家雞犬如相識
一塢山林特見招
尚憶木瓜園最好興殘中路且回橈

酴醾金沙二花合發

相扶照水弄春柔
發似矜夸歛似羞
碧合晚雲霞上起
紅爭朝日雪邊流
我無丹白知如夢
人有朱鉛見即愁
疑此冶容詩所忌
故將膠木比綢繆

次韻公闕正議書公戲語申之以祝助發一笑

故人辭祿未忘情
語我猶能作扞城
身不自遭如貢薛
兒應堪教比韋平
老罷豈得長高卧
雛鳳仍聞已間生
把盞祝公公莫拒
緇衣心為好賢傾

次韻致遠木人洲二首

迷子山前漲一洲
木人圖志失編收
年多但有柳生肘
地僻獨無茅蓋頭
河側鮑生乾尚立
江邊屈子槁將投
未妨他日稱居士
能使君疑福可求

二

杙爾何年客此洲
飄流誰弃止誰收
無心使口肝使目
有榦作身根作頭
暴露神靈難寄託
禱祠村落幾依投
紛紛翦紙真虛負
立槁安知富可求

次韻酬龔深甫二首

恩容楚老護松楸復得一龔從我遊講肄劇談兼祖謝
舞雩高蹈異求由北尋五柞故未慙東挽三楊仍有樛
陟嶽降原從此始但無瑤玉與君舟

二

握手東岡雪滿簪後期惆悵老吳蠶芳辰一笑真難值
暮齒相思豈久堪他日杜詩傳渭北幾時周宅對漳南
百年邂逅能多少且可勤來共草菴

次葉致遠韻

生涯聊占水中洲
豈即乘桴逐聖丘
身與鳬飛仍雁集
心能茅靡亦波流
由來杞梓常先伐
誰謂菰蒲可久留

乘興吾廬知未厭
故移修竹擬延騶

一作知君聊占水中洲去即東浮逐

聖丘憂國無時須問舍得坻有興即乘流由來要路當先據誰謂窮鄉可久留他日五湖尋范蠡想能重此駐騶

次韻酬朱昌叔五首

點也自殊由與求
既成春服更何憂
拙於人合且天合

靜與道謀非食謀未愛京師傳谷口但知鄉里勝壺頭
嗟余老矣無一事復得此君相與遊

二

去年音問隔淮州百謫難知亦我憂前日杯盤共江渚
一歡相屬豈人謀山蟠直瀆輸淮口水挹長干轉石頭
乘興舟輿無不可春風從此與公遊

三

烏榜登臨興未休共言何許更消憂聯裾蕭寺尋真覺

方駕孫陵弔仲謀語罷每開歡笑口詩來仍掉苦吟頭
已知軒冕真吾累且可追隨馬少遊

四

白下門東春水流相看一噓散千憂穿梅入柳曾莫逆
度塹緣岡初不謀世事但如吹劍首官身難即問刀頭
長臨鍛竈真自苦有興復來從我遊

五

樂世間身豈易求巖居川觀更何憂放懷自事如初服

買宅相招亦本謀名譽子真矜谷口事功新息困壺頭
知君於此皆無累長得追隨壙垆遊

次韻送程給事知越州

千騎東方占上頭如何誤到北山遊清明若覩蘭亭月
暖熱因忘蕙帳秋投老始知歡可惜通宵豫以別為憂
西歸定有詩千首想肯重來賁一丘

次韻酬徐仲元

投老逍遙紀與堂天刑真已脫桁楊緣源靜翳無魚淦

度谷深追有鳥頑每苦交遊尋五柳最嫌尸祝擾庚桑
相看不厭唯夫子風味真如顧建康

詩奉送覺之奉使東川

三秋不見每惓惓握手山林復悵然後會敢期黃耆日
相看且度白雞年畏途石棧王尊馭榮路金門祖逖鞭
一代官儀新藻拂得瞻宸宇想留連

次韻奉酬覺之

久知乘傳入西州雞黍從容本不謀戶外驚塵尺書至

眼中飛浪片帆收
山林病骨煩三顧
湖海離腸欲萬周
尚有光華賁岑寂
篋中佳句得長留

送程公闢得謝歸姑蘓

東歸行路嘆賢哉
碧落新除寵上才
白傅林塘傳畫去
吳王花鳥入詩來
唱酬自有微之在
談笑應容逸少陪

少保元絳謝事居姑蘇又王中甫善歌詞與相唱酬燕集
除此兩翁相見外
不知三

徑為誰開

送項判官

斷蘆洲渚落楓橋渡口沙長過午潮山鳥自呼泥滑滑
行人相對馬蕭蕭十年長自青衿識千里來非白壁招
握手祝君能強飯華簪常得從雞翹

次韻張德甫奉議

知君非我載醪人終日相隨免汙茵賞盡高山見流水
唱殘白雪值陽春中分香積如來鉢對現毗耶長者身
誰拂定林幽處壁與君圖寫繼吾真

北山三詠

寶公塔

道林真骨葬青霄，宰堵千秋未寂寥。
寶勢旁連大江起，尊形獨受衆山朝。
雲泉別寺分三徑，香火幽人止一瓢。
我亦鷲峰同聽法，歲時歌嘏豈辭遙。

覺海方丈

往來城府住山林，諸法脩然但一音。
不與物違真道廣，每隨緣起自禪深。
舌根已淨誰能壞，足迹如空我得尋。
歲晚北窓聊寄傲，蒲萄零落半牀陰。

道光泉

籊龍將雨繞山行
注遠投深靜有聲
雲涌浴槽朝自暖
虹垂齋鑊午還晴
銅瓶各滿幽人意
玉甃因高正士名
神力可嗟妨智巧
桔槔零落篲苔生

登寶公塔

倦童疲馬放松門
自把長筇倚石根
江月轉空為白晝
嶺雲分暝與黃昏
鼠搖岑寂聲隨起
鷗矯荒寒影對翻
當此不知誰客主
道人忘我我忘言

重登寶公塔復用前韻二首

空見方墳涌半霄，難將生死問參寥。
應身東返知何國，瑞相西歸自本朝。
遺寺有門非輦路，故池無鉢但僧瓢。
獨龍下視皆陳迹，追數齊梁亦未遙。

二

碧玉旋螺恍隔霄，冠山仙冢亦寥寥。
空餘華構延風月，無復靈蹤落市朝。
帳座追嚴多獻寶，供盤隨施有操瓢。
他方出沒還如此，與物何心作邈遙。

紙暖閣

聯屏蓋障一尋方
南設鈎簾北置牀
側座對敷紅絮暖
仰窓分啟碧紗涼
氈廬易以梅烝壞
錦幄終於草野妨
楚穀越藤真自稱
每糊因得減書囊

雨花臺

盤互長干有絕陁
并包佳麗入江亭
新霜浦溆綿綿淨
薄晚林巒往往青
南上欲窮牛渚怪
北尋難忘草堂靈
便輿却走垂楊陌
已戴寒雲一兩星

北窓

病與衰期每強扶雞壘枯梗亦時須空花根蒂難尋摘
夢境烟塵費掃除耆域藥囊真妄有軒轅經匱或元無
北窓枕上春風暖漫讀毗耶數卷書

小姑

小姑未嫁與蘭支何恨流傳樂府詩初學水仙騎赤鯉
竟尋山鬼從文狸繽紛雲襖空棠檝綽約烟鬟獨桂旗
弄玉有祠終或往飛瓊無夢故難知

榮上人遽欲歸以詩留之

道人傳業自天台千里脩然赴感來梵行毗沙為外護
法筵靈曜得重開已能為我迈神足便可隨方長聖胎
肯顧北山如慧約與公西崦劇莓苔

呈陳和叔并序

嘉祐末和叔以集賢校理判登聞鼓院同知太常禮院
皮場街有園數畝中置二椽甃袤丈北戶臨溝略約通
街旁作小屋毀輜車為蓋某以直集賢院為三司度支

判官以知制誥糾察在京刑獄同管勾三班院閒度約
飯車蓋下隨所有無坐卧輒上笑語常至夜如此三歲
而和叔遭太夫人憂未幾某亦喪親以去時永昭陵尚
未復土也後與和叔皆蒙今上拔用數會議語皆憂傷
之餘責厚事叢無復故情元豐元年某食觀使祿居鍾
山南和叔經畧廣東道舊悵然某作詩以叙其事

毀車為屋僅容身三歲相要薄主人晝寓棹輒常至夜
冬沿溝約復尋春南陔不洎公歸里蒼墓垂成我喪親

後會縱多無此樂山林投老一傷神

招呂望之使君

潮溝東路兩牛鳴十畝漪漣一草亭
委質山林如許國寄懷魚鳥欲忘形
紛紛易變浮雲白落落誰鍾老柏青
尚有使君同好惡想隨秋水肯揚舲

公闢枉道見過獲聞新詩因叙歎仰

青丘神父能為政碧落仙翁好作詩
舊事齊兒應共記新篇楚老得先知
懷甑大峴如迎日供帳闔門勝去時

若與鴟夷鬪百草錦囊佳麗敵西施

全椒張公有詩在北山西菴僧者慢之悵然

有感

十年悵悵躡山阡終欲持杯滴到泉東路角巾非故約
西州華屋漫修椽幽明永隔休炊黍真俗相妨久絕弦
遺墨每看疑邂逅復隨人事散如烟

嶺雲

嶺雲合處小盤桓人得數衾馬解鞍寒英著天榆歷歷

淨華浮海桂團圓
交遊渙散淵明喜
吏卒蕭條叔夜寬
方丈老翁無一髮
更知來不為皮冠

蓼蟲

蓼蟲事業無餘習
芻狗文章不更陳
隱几自憐居喪我
倨堂誰覺似非人
難堪藏室稱中士
祇合箕山作外臣
尚有少緣灰未死
欲持新句惱比鄰

莫疑

莫疑禪伯未知禪
莫笑仙翁不學仙
靈骨肯傳黃蘗燼

真心自放赤松烟
蓮華世界何關汝
楮葉工夫浪費年
露竊聲中江月白
一燈岑寂擁書眠

臨川文集卷十七

欽定四庫全書

臨川文集卷十八

宋 王安石 撰

律詩

七言八句

示俞秀老

外厨遺火示公佐

讀眉山集次韻雪詩五首

讀眉山集愛其雪詩能用韻復次韻一首

八功德水

寄題程公闢物華樓

酬俞秀老

次韻吳沖卿召赴資政殿聽讀詩義感事

張侍郎示東府新居詩因和酬二首

次韻沖卿從駕至集禧觀偶成

次韻陪駕觀燈

和吳相公東府偶成

和蔡樞密孟夏旦日西府書事

和蔡副樞賀平戎慶捷

次韻奉和蔡樞密南京種山藥法

次韻元厚之平戎慶捷

謁曾魯公

駕自啟聖還內

集禧觀池上詠野鵝

次韻東廳韓侍郎齋居晚興

酬和甫祥源觀醮罷見寄

和御製賞花釣魚二首

次楊樂道韻六首

後殿朝次偶題

御溝

幕次憶漢上舊居

後苑詳定書懷

上巳聞苑中樂聲書事

用韻書十日事呈樂道舍人聖從待制

詳定幕次呈聖從樂道

崇政殿詳定幕次偶題

詳定試卷二首

奉酬楊樂道

奉酬聖從待制

次韻吳仲庶省中畫壁

夜讀試卷呈君實待制景仁內翰

答張奉議

示俞秀老

繚繞山如涌翠波人家一半在煙蘿時豐笑語春聲早
地僻追尋野興多宰堵朱甍開北向招提素脊隱西阿
暮年要與君攜手處處相煩作好歌

外厨遺火示公佐

刀匕初無欲清

七姓切

人如何竈鬼尚嫌嗔脩脩裋褐方

煬

一作團

火冉冉青煙已被宸邂逅焚巢連鳥雀倉黃濡

幕愧比鄰王陽幸有囊衣在報賞焦頭亦未貧

讀眉山集次韻雪詩五首

若木昏昏未有鵲凍雷深閉阿香車
搏雲忽散筵爲屑
翦水如分綴作花
擁篲尚憐南北巷
持杯能喜兩三家
戲按弄掬輸兒女
焦袖龍鍾手獨叉

二

神女青腰寶髻鵲獨藏雲氣委飛車
夜光往往多聯壁
白小紛紛每散花
珠網纒連拘翼座
瑤池淼漫阿環家
銀爲宮闕尋常見
豈即諸天守夜叉

三

惠施文字黑如鴟於此機緘漫五車
瞬若易緇終不染紛然能幻本無花
觀空白足寧知處疑有青腰豈作家
慧可忍寒真覺晚爲誰將手少林叉

四

寄聲三足阿環鴟問訊青腰小駐車
一一照肌寧有種紛紛迷眼爲誰花
爭妍恐落江妃手耐冷疑連月姊家
長恨玉顏春不久畫圖時展爲君義

五

戲搥微縞女鬟鵝試咀流酥已頽車歷亂稍埋冰揉粟
消沉時點水圓花豈能舴艋真尋我且與蝸牛獨臥家
欲挑青腰還不敢直湏詩膽付劉叉

讀眉山集愛其雪詩能用韻復次韻一首

靚粧嚴飾曜金鶚比興難工漫百車水種所傳清有骨
天機能識皦非花嬋娟一色明千里綽約無心熟萬家
長此賞懷甘獨卧衮安交戟豈湏叉

八功德水

雪山馬口出琉璃聞說諸天與護持此水遙連八功德
供人真淨四威儀當時迦葉無塵染何事閔鄉有土思
道力起緣非一路但知瓢飲是生疑

寄題程公闕物華樓

吳楚東南最上游江山多在物華樓遙瞻旌節臨尊俎
獨卧柴荆阻獻酬想有新詩傳素壁怪無餘墨到滄洲
隅渚南望重重綠章水還能內此流

酬俞秀老

灑掃東庵置一牀
於君獨覺故情長
有言未必輸摩詰
無法何曾泥飲光
天壤此身知共弊
江湖他日要相忘
猶貪半偈歸思索
却恐提桓妄揣量

次韻吳冲卿召赴資政殿聽讀詩義感事

冲卿

詩云雪銷鵲鵲御溝融
燕見殊恩綴上公
畫日乍驚三接寵
正風獲聽二南終
解頤共仰天顏喜
牆面裁容聖域通
午漏漸長知禹錫
侍臣何術補堯聰
時修撰經義所初進
二南有旨資政殿讀云

周南麟趾聖人風未有騶虞繫召公雅頌兼陳爲四始
笙歌合奏以三終討論詔使成書上休澣恩容著籍通
牆面豈能知奧義延陵聽賞自爲聰

張侍郎示東府新居詩因而和酬二首

得賢方慕北山萊赤白中天二府開功謝蕭規慙漢第
恩從隗始詫燕臺曾留上主經過跡更費高人賦詠才
自古落成須善頌掃除東閣望公來

榮觀流傳動草萊中官賜設上尊開鼓歌寧寐聽疑夢
肴果聯翩餽有臺芥藻故應宜舊德棟梁非復稱凡才
虛堂欲踵曹參事試問齊人或肯來

次韻沖卿上元從駕至集禧觀偶成

昭陵持橐從遊人更見熙寧第四春寶構中開移玉座
華燈錯出映朱塵輦前時看新歌舞仗外還如舊徼巡
投老逢時追往事却含愁思度天津

次韻陪駕觀燈

繡簾含風下玉除
宮商挾奏斐然殊
福祥周室流爲火
恩澤堯樽散在衢
伏枕但能知廣樂
揮毫何以報明珠
願留巾篋歸田日
追詠公歡每自娛

和吳相公東府偶成

承華往歲幸躊躇
風月清談接緒餘
並轡入朝今已老
連牆得屋喜如初
誅茅我夢江臯地
澆薤公思洛水渠
歛退故應容拙者
先營環堵祭牢蔬

和蔡樞密孟夏旦日西府書事

宮闕初晴氣象饒寶車攢轂會東朝重輪慶自離明發
內壤陰隨解澤消賜篚外廷紛錦繡燕庖中禁續薪樵
聯翩入賀知君意咫尺威顏不隔霄

和蔡副樞賀平戎慶捷

城郭名王據兩陲軍前一日送降旗羗兵自此無傳箭
漢甲如今不解纍幕府上功聯舊代朝廷稱慶具新儀
周家道泰西戎喙還見詩人詠串夷

次韻奉和蔡樞密南京種山藥法

蔡詩并序
云蒙見索

南都種山藥法并以生頭數十莖送上輒成
小詩青青正是中分天區種何妨試玉延即
見引須緣夏木定知如蹠薦冬筵以俗傳種之時
人即潤還御水冰霜結蔭近堯雲雨露偏自
裏自題還自媿握
苗應笑宋人然

區種拋來六七年春風條蔓想宛延難追老圃莓苔徑
空對珍盤玳瑁筵嘉種忽傳河右壤靈苗更長闕西偏
故畦穿斲知何日南望鍾山一慨然

次韻元厚之平戎慶捷

來詩有何人更得通
天帶謀合君心只晉

公之
句

朝廷今日四夷功先以招懷後殪戎胡地馬牛歸隴底
漢人煙火起湟中投戈更講諸儒藝免胄爭趨上將風
文武佐時慚吉甫宣王征伐自膚公

謁曾魯公

即赴會時

翊戴三朝冕有蟬歸榮今作地行仙且開京闕一作洛蕭
何第未放江湖范蠡船老景已鄰周呂尚慶門方似漢
韋賢一觴豈足為公壽願賦長虹吸百川

駕自啟聖還內

衣冠原廟漢家儀羽衛親來此一時天子當懷霜露感
都人亦歎鼓簫悲紛紛瑞氣隨雲漢漠漠榮光上日旗
塵土未驚閭闔閉綠槐空覆影參差

集禧觀池上詠野鵝

池上野鵝無數好晴天鏡裏雪毳毼似憐暄暖鳴相逐
疑戀寬閑去却回京洛塵沙工點汙江湖矰弋飽驚猜
羽毛的的人難近嗟此謀身或有才

次韻東廳韓侍郎齋居晚興

齋禁雖嚴異太常蕭然高卧意何長煙含欲暝宮庭紫
日映新秋省闈黃壯節易推行蹢躅華年相背去堂堂
追攀坐歎風塵隔空聽釣天夢帝鄉

酬和甫祥源觀醺罷見寄

竊祿祠官久見容每持金石薦宸衷釣天忽忽清都夢
方丈寥寥水風知結勝緣人意外想尋陳迹馬蹄中
新詩起我超然興更感鍾山蕙帳空

和御製賞花釣魚

陰幄晴雲拂曉開傳呼仙仗九天來披香殿上留朱輦
太液池邊送玉杯宿藥暖含風浩蕩戲鱗清映日徘徊
宸章獨與春爭麗恩許賡歌豈易陪

二

靄靄祥雲輦路晴傳呼萬歲雜春聲蔽虧玉仗宮花密
映燭金溝御水清珠藥受風天下暖錦鱗吹浪日邊明
從容樂飲真榮遇願賦嘉魚頌太平

次楊樂道韻六首

後殿朝次偶題

百年文物士優游萬國今方似綴旒
發策東堂招雋乂回輿北苑罷倡優
忽隨諸彥登龍尾尚憶當年應鵠頭
獨望清光無補報更慙虛食大官羞

御溝

渺渺金河漲欲平數支分綠報清明
常縈輦路漂花去更引流杯送酒行
靜見金輿穿樹影清含玉漏過牆聲
衰顏一照自多感迴首江南春水生

幕次憶漢上舊居

漢水泱泱繞鳳林，峴山南路白雲深。
如何憂國忘家日，尚有求田問舍心。
直以文章供潤色，未應風月負登臨。
超然便欲遺榮去，却恐元龍會見侵。

後苑詳定書懷

文墨由來妙禁中，家傳豈獨賦河東。
平生聽想風聲早，數日追隨笑語同。
御水新如鴨頭綠，宮花更有鶴翎紅。
看花弄水聊為樂，不晚朝廷相弱翁。

上巳聞苑中樂聲書事

苑中誰得從春遊
想見漸臺瓦欲流
御水曲隨花影轉
宮雲低繞樂聲留
年華未破清明節
日暮初回祓禊舟
更覺至尊思慮遠
不應全爲拙倡優

用樂道舍人韻書十日事呈樂道舍人聖
從待制

東門人物亂如麻
想見新羈照路華
午鼓已傳三刻漏
從官初賜一杯茶
匆匆殿下催分首
擾擾官前聽賣花

歸去莫言天上事但知呼客飲流霞

詳定幕次呈聖從樂道

殿閣掄材覆等差從臣今日擅文華
揚雄識字無人敵何遜能詩有世家
舊德醉心如美酒新篇清目勝真茶
一觴一詠相從樂傳說猶堪異日誇

崇政殿詳定幕次偶題

嬌雲漠漠護層軒嫩水濺濺不見源
禁柳萬條金細撚宮花一段錦新翻
身開始更知春樂地廣還同避世喧

不恨玉盤水未賜清談終日自蠲煩

詳定試卷二首

簾垂咫尺斷經過把卷空聞笑語多
論衆勢難專可否
法嚴人更謹誰何文章直使有無
類勲業安能保不磨
疑有高鴻在寥廓未應迴首顧張羅

二

童子常誇作賦工暮年羞悔有揚雄
當時賜帛倡優等
今日論才將相中細甚客卿因筆墨
卑於爾雅注魚蟲

漢家故事真當改新詠知君勝弱翁

奉酬楊樂道

邂逅聯裾殿閣春却愁容易即離群相知不必因相識
所得如今過所聞近代聲名出盧駱前朝筆墨數淵雲
與公家世由來事愧我初無百一分

奉酬聖從待制

班行想望歲空多知有龍門未敢過和近聖人師展季
勇爲君子盜荆軻三刀舊協庭闈夢五袴今傳里巷歌

復道諫書嘗滿篋不唯詩句似陰何

次韻吳仲庶省中畫壁

畫史雖非顧虎頭還能滿壁寫滄洲
九衢京洛風沙地一片江湖草樹秋
行數條魚賓共樂卧看鷗鳥吏方休
知君定有扁舟意却為丹青肯少留

夜讀試卷呈君實待制景仁內翰

篝燈時見語驚人更覺揮毫捷有神
學問比來多可喜文章非特巧爭新
蕉中得鹿初疑夢牖下窺龍稍眩真

邂逅兩賢時所服坐令孤朽得相因

答張奉議

五馬渡江開國處一牛乳地作菴人結蟠茅竹纔方丈
穿築溝園未過旬我久欲忘言語道君今來見句文身
思量何物堪酬對棒喝如今搃不親

臨川文集卷十八

欽定四庫全書

集部

臨川文集卷

十九至
二十二

詳校官庶吉士_臣龍廷槐

檢討_臣何思鈞覆勘

覆校官中書_臣呂雲棟

校對官主簿_臣汪日贊

謄錄舉人_臣曹錫齡

欽定四庫全書

臨川文集卷十九

宋 王安石 撰

律詩

七言八句

次韻和吳仲庶池州齊山畫圖

次韻祖擇之登紫微閣二首

送沈興宗察院出使湖南

春風

永濟道中寄諸舅弟

道逢文通北使歸

將次相州

次韻平甫喜唐公自契丹歸

尹村道中

次韻王勝之詠雪

次韻酬府推仲通學士雪中見寄

次韻宋次道憶太平早梅

和曾子翊授舒掾之作

送劉和父奉使江西

次韻張子野竹林寺二首

送吳龍圖知江寧

送直講吳殿丞宰鞏縣

送真州吳處厚使君

送李質夫知陝府

題儀真致政孫學士歸來亭

次韻吳季野題岳上人澄心亭

送彥珍

寄張先郎中

汜水寄和甫

寄黃吉甫

次韻平甫村墅春日

即席次韻微之泛舟

示長安君

和平甫招道光法師

和祖仁晚過集禧觀

程公闕轉運江西

次韻微之即席

和王微之秋浦望齊山感李太白杜牧之

次韻王微之登高齋

和微之重感南唐事

李君鼎弟訪別長蘆至淮陰追寄

貴州虞部使君訪及道舊竊有感惻因成小詩

沖卿席上得行字

示董伯懿

次韻和吳仲庶池州齊山畫圖

知制誥
時作

省中何忽有崔嵬六幅生綃坐上開指點便知巖石處
登臨新作使君來雅懷重向丹青得勝勢兼隨翰墨回
更想杜郎詩在眼一江春雪下離堆

次韻祖擇之登紫微閣二首

漠漠秋陰護掖垣青雲祇在兩楹間宮樓唱罷雞人遠

門闕朝歸虎士閑華蓋北瞻天帝座蓬萊東想道家山
却慙久此隨諸彦文采初無豹一斑

二

掖門相對敞銅鑲轍轍飛甍在兩間潤色平生知地禁
登臨此日愧身閑浮雲倒影移窻隙落木回飈動屋山
忽憶初來秋尚早紫微花點綠苔斑

送沈興宗察院出使湖南

諫書平日早囊中朝路爭看一馬驄漢節飽曾衝海霧

楚帆聊復借湖風
皇華命使今爲重
直道酬君遠亦同
投老承明無補助
得爲湘守即隨公

春風

一馬春風北首燕
却疑身得舊山川
陽浮樹外滄江水
塵漲原頭野火煙
日借嫩黃初著柳
雨催新綠稍歸田
回頭不見辛夷發
始覺看花是去年

永濟道中寄諸舅弟

燈火忽忽出館陶
回首永濟日初高
似聞空舍烏鳥樂

更覺荒陂人馬勞客路光陰真棄置春風邊塞祗蕭騷
辛夷樹下烏塘尾把手何時得汝曹

道逢文通北使歸

朱顏使者錦貂裘笑語春風入貝州欲報京都近消息
傳聲車馬少淹留行人盡道還家樂騎士能吹出塞愁
回首此時空慕羨驚塵一段向南流

將次相州

青山如浪入漳州銅雀臺西八九丘螻蟻往還空壘畝

騏驎埋沒幾春秋功名蓋世知誰是氣力迴天到此休
何必地中餘故物魏公諸子分衣裘

次韻平甫喜唐公自契丹歸

予辭北使而唐公代往

留犁撓酒得戎心繡袷通歡歲月深奉使由來須陸賈
離親何必強曾參燕人候望空甌脫胡馬追隨出蹕林
萬里春風歸正好亦逢佳客想揮金

尹村道中

滿眼霜吹宿草根謾知新歲不逢春却疑青嶂非人世

更覺黃雲是塞塵萬里張侯能奉使百年曾子肯辭親
自憐許國終無用何事紛紛客此身

次韻王勝之詠雪

萬戶千門車馬稀行人却返鳥休飛玲瓏翦水空中墮
的皪裝春樹上歸素髮聯華驚老大玉顏爭好羨輕肥
朝來已賀豐年瑞更問田家果是非

次韻酬府推仲通學士雪中見寄

朝來看雪咏君詩想見朱衣在赤墀為問火城將策試

何如雲屋聽牕知曲牆稍覺吹來密窮巷終憐掃去遲
欲訪故人非興盡自緣無路得傳卮

次韻宋次道憶太平早梅

大梁春費寶刀催不似湖陰有早梅今日盤中看翦綵
當時花下就傳杯紛紛自向江城落杳杳難隨驛使來
知憶舊游還想見西南枝上月徘徊

和曾子翊授舒掾之作

皖城終歲靜如山府掾應從到日閑一水碧羅栽繚繞

萬峰蒼玉刻孱顏舊遊筆墨苔今老浪走塵沙鬢已斑
攬轡羨君橋北路春風枝上鳥關關

送劉和父奉使江西

劉郎今日擁旌麾傳到江西喜可知上冢還須擊羊豕
下車應不問狐狸無人敢效

一作勸

公榮酒為我聊尋逸

少池亦見嶺頭花爛漫更將春色寄相思

次韻張子野竹林寺二首

澗水橫斜石路深水源窮處有叢林青鴛幾世開蘭若

黃鶴當年瑞卯金敗壁數峰連粉墨涼煙一穗起檀沈
十年親友半零落回首舊遊成古今

二

京峴城南隱映深兩牛鳴地得禪林風泉隔屋撞哀玉
竹月綠堦貼碎金藻井仰窺塵漠漠青燈對宿夜沈沈
扁舟過客十年事一夢此山愁至今

送吳龍圖知江寧

才高明主睠方深屬郡聞風自草心閭里不須多按治

山川從此數登臨茅簷坐隔雲千里栢壟初抽翠一尋
東望泫然知有寄但疑公豈久分襟

送直講吳殿丞宰鞏縣

青嵩碧洛曾遊地墨綬銅章忽在身擁馬尚多畿甸雪
隨衣無復禁城塵古來學問須行已此去風流定慰人
更憶少陵詩上語知君不負鞏梅春

送真州吳處厚使君

江上齋船駐彩橈鳴笳應滿綠楊橋久爲漢吏知文法

當使淮人服教條拱木延陵瞻故國叢祠瓜步認前朝
登臨莫負山川好終欲東歸聽楚謠

送李質夫知陝府

平世求才漫至公悠悠羈旅士多窮十年見子尚短褐
千里隨人今北風戶外屨貧虛自滿樽中酒賤亦常空
共嫌欲老無機械心事還能與我同

題儀真致政孫學士歸來亭

彭澤陶潛歸去來素風千歲出塵埃明時雋老心無累

故里高門子有才更作園林負城郭當留花月映池臺
却尋五柳先生傳柴水區區但可哀

次韻吳李野題岳上人澄心亭

高亭五月尚寒生回首塵沙自鬱蒸砌水亂流穿石底
檻雲高出蔽山層躋攀欲絕人間世締搆知從物外僧
腸胃坐來清似洗神奇未怪佛圖澄

送彥珍

挾筴窮鄉滿鬢絲陂田荒盡豈嘗窺未應谷口終身隱

正合菑川舉國推握手百憂空往事還家一笑即芳時
柘岡定有辛夷發亦見東風使我知

寄張先郎中

留連山水住多時年比馮唐未覺衰篝火尚能書細字
郵筒還肯寄新詩胡牀月下知誰對蠻榼花前想自隨
投老主恩聊欲報每瞻高躅恨歸遲

汜水寄和甫

虎牢關下水逶迤想汝飄然過此時灑血祇添波浪起

脫身難借羽翰追留連厚祿非朝隱乖隔殘年更土思
已卜冶城三畝地寄聲知我有歸期

寄黃吉甫

朱顏去似朔風驚白髮多於野草生挾筴讀書空有得
求田問舍轉無成解鞍烏石岡邊坐攜手辛夷樹下行
今日追思真樂事黃塵深處走雞鳴

次韻平甫村墅春日

昨日青青尚未齊忽看春色滿高低陂梅弄影爭先舞

葉鳥藏身自在啼
樵蹠踏雲歸舊徑
漁蓑背雨向前溪
似知我欲逃軒冕
談笑相過各有携

即席次韻微之泛舟

畫舸幽尋北果園
應將陳迹問桑門
地隨牆墅行多曲
天著岡巒望易昏
故國時平空有水
荒城人少半爲村
悠悠興廢皆如此
賴付乾愁酒一罇

示長安君

少年離別意非輕
老去相逢亦愴情
草草杯盤供笑語

昏昏燈火話平生自憐湖海三年隔又作塵沙萬里行
欲問後期何日是寄書應見鴈南征

和平甫招道光法師

鍊師投老演真乘像劫空王爪與肱於摠持門通一路
以光明藏續千燈從容發口酬摩詰邂逅持心契慧能
新句得公還有賴古人詩字耻無僧

和祖仁晚過集禧觀

妍暖聊隨馬首東春衫猶未著方空煙霞送色歸瑤水

山木分香繞閭風壯髮已輸塵外綠衰顏漫到酒邊紅
日斜歸去人間世却記前遊似夢中

程公闕轉運江西

江西一節鑄黃金最慰章濱父老心長孺向來真強予
次公今不異重臨餘風尚有歡謠在陳迹非無勝事尋
豫想新詩能寄我十年華省故情深

次韻微之即席

釀成吳米野油囊却愛清談氣味長閑日有僧來北阜

平時無盜出南塘風亭對竹酬孤峭雪逕尋梅認暗香
江水中濡應未變一杯終欲就君嘗

和王微之秋浦望齊山感李太白杜牧之

齊山置酒菊花開秋浦聞猿江上哀此地流傳空筆墨
昔人埋沒已蒿萊平生志業無高論末世篇章有逸才
尚得使君驅五馬與尋陳迹久徘徊

次韻王微之登高齋

臺殿荒墟煇井堙豪華不復見臨春北山漠漠雲垂地

南埭悠悠水映人，馳道蔽虧松半死。
射場埋沒雉多馴，登高一曲悲亡國。
想繞紅梁落暗塵。

和微之重感南唐事

叔寶傾陳衍弊梁，可嗟曾不見興亡。
齋祠父子終身費，酣詠君臣舉國荒。
南狩皖山非故地，北師淮水失名王。
天移四海歸真主，誰誘昏童肯用良。

李君弼弟訪別長蘆至淮陰追寄

怒水憑風雪壘高，亂流追我祇魚舠。
忽看淮月臨寒食。

想映江春聽伯勞道義當成麟一角文章已禿兔千毫
後生可畏吾知子南北何時見兩髦

貴州虞部使君訪及道舊竊有感惻因成小

詩

韶山秀拔江清寫氣象還能出搢紳當我垂髫初識字
看君揮翰獨驚人郵籤忽報旌麾入齋閣遙瞻組綬新
握手更誰知往事同時諸彥略成塵

沖卿席上得行字

二年相值喜同聲並轡塵沙眼亦明
新詔各從天上得殘樽同向月邊傾
已嗟後會歡難必更想前官責尚輕
黽勉敢忘君所勗古人憂樂有違行

示董伯懿

穿橋度塹祇閑行詠石嘲花亦漫成
嚼蠟已能忘世味畫脂那更惜時名
長干里北寒山紫白下門西野水明
此地一廛須卜築故人他日訪柴荆

臨川文集卷十九

欽定四庫全書

臨川文集卷二十

宋 王安石 撰

律詩

七言八句

思王逢原三首

和吳御史臨淮感事

和文淑湓浦見寄

次韻吳季野再見寄

次韻平甫贈三靈山人程惟象

次韻和甫詠雪

次韻張氏女弟詠雪

次韻徐仲元詠梅二首

詩呈節判陸君

留題曲親盆山

不到太初兄所居遂已十年以詩攀寄

偶成二首

雨過偶書

李春上旬苑中即事

上西垣舍人

退朝

與微之同賦梅花得香字三首

和晚菊

景福殿前柏

四月果

牆西樹

度摩嶺寄辛老

狄梁公陶淵明俱爲彭澤令至今有廟在焉

景純作詩見示繼以一篇

寄沈都陽

送裴如晦宰吳江

次韻樂道送花

籌思亭

愁臺

和正叔懷其兄草堂

鄭子憲西齋

寄題思軒

陳君式大夫旅軒

寄黃吉甫

高魏留

丁年

思王逢原三首

布衣阡陌動成群卓犖高才獨見君杞梓豫章蟠絕壑
騏驎騁褭跨浮雲行藏已許終身共生死那知半路分
便恐世間無妙質鼻端從此罷揮斤

二

蓬蒿今日想紛披冢上秋風又一吹妙質不爲平世得
微言唯有故人知廬山南墮當書案湓水東來入酒卮
陳迹可憐隨手盡欲歡無復似當時

三

百年相望濟時功
歲路何知向此窮
鷹隼奮飛凰羽短
騏驎埋沒馬群空
中郎舊業無兒付
康子高才有婦同
想見江南原上墓
樹枝零落紙錢風

和吳御史臨淮感事

柵鎖城扉曉一開
施牙車軸轉成雷
黃塵欲礙龜山出
白浪空分汴水來
澄觀有材邀昧陋
霽雲無力報奸回
騷人此日追前事
悲氣隨風動管灰

和文淑湓浦見寄

多難漂零歲月賒空餘文墨舊生涯相看楚越常千里
不及朱陳似一家髮為感傷無翠葆眼從瞻望有玄花
唯詩與我寬愁病報爾何妨賦棣華

次韻吳季野再見寄

衣裘南北弊風塵志趣卑汙已累親流俗尚疑身察察
交遊方笑黨頻頻遠同魚樂思濠上老使鷗鷺耻海濱
邂逅得君還恨晚能明吾意久無人

次韻平甫贈三靈山人程惟象

家山松菊半荒蕪杖策窮年信所如
占見地靈非卜筮
算知人貴自陶漁久諳郭璞言多驗
老比顏含意更疎
祇欲勒成方士傳借君名姓在新書

次韻和甫詠雪

奔走風雲四面來
坐看山壘玉崔嵬
平治險穢非無德
潤澤焦枯是有才
勢合便疑包地盡
功成終欲放春回
寒鄉不念豐年瑞
只憶青天萬里開

次韻張氏女弟詠雪

天上空多地上稀
初寒風力故應微
那能鎮壓黃塵起
強欲侵凌白日飛
邑犬橫來矜意氣
窟蟾偷出助光輝
都城只有袁安憊
我亦年年幸賜衣

次韻徐仲元詠梅二首

溪杏山桃欲占新
高梅放藥尚嬌春
額黃映日明飛燕
肌粉含風冷太真
玉笛悲涼吹易散
冰紈生澀畫難親
爭妍喜有君詩在
老我一作我老脩然敢效顰

舊挽青條冉冉新花遲亦度柳前春肌冰綽約如姑射
膚雪參差是太真搖落會應傷歲晚攀翻賸欲寄情親
終無驛使傳消息寂寞知誰笑與顰

詩呈節判陸君

名彥回

中郎筆墨妙他年晚與君遊喜象賢款款故情初未慙
飄飄新句摠堪傳英才但未遭文舉明主寧當棄浩然
投贈臨分加組麗小詩能不强雕鐫

留題曲親盆山

和州曲叙

巧與天成未覺殊國工施手豈須臾根連滄海蓬萊閣
勢壓黃河砥柱孤坐上煙嵐生紫翠影中樓閣見青朱
爲山觀水皆良喻誰向居家識所趨

不到太初兄所居遂已十年以詩攀寄

一水衣巾翦翠綃九峰環珮刻青瑤生才故有山川氣
卜築兼無市井囂三葉素風門閥在十年陳迹屢綦銷
歸榮早晚重攜手莫負幽人久見招

偶成二首

漸老偏諳世上情已知吾事獨難行脫身負米將求志
戮力求田豈為名高論頗隨衰俗廢壯懷難值故人傾
相逢始覺寬愁病搔首還添白髮生

二

懷抱難開醉易醒曉歌悲壯動秋城年光斷送朱顏去
世事栽培白髮生三畝未成幽處宅一身還逐衆人行
可憐蝸角能多少獨與區區觸事爭

雨過偶書

沛然甘澤洗塵寰
南畝東郊共慰顏
地望歲功還物外
天將生意與人間
霽分星斗風雷靜
涼入軒窗枕簟閒
誰似浮雲知進退
纔成霖雨便歸山

季春上旬苑中即事

輦路行看斗柄東
簾垂殿閣轉春風
樹林隱翳燈含霧
河漢欹斜月墜空
新蒞漫知紅簌簌
舊山常夢碧叢叢
賞心樂事須年少
老去應無日再中

上西垣舍人

共說才高世所珍諸賢誰敢望光塵討論潤色今爲美
學問文章老更醇賦擬相如真復似詩看子建的應親
仍聞悟主言多直許史家兒往往嗔

退朝

門外鳴騶送響頻披衣強起赴雞人火城夜闌雲藏闕
玉座朝寒雪被宸邂逅欲成雙白鬢蕭條難得兩朱輪
猶憐退食親朋在相與吟哦未厭貧

與微之同賦梅花得香字三首

漢宮嬌額半塗黃粉色凌寒透薄粧好借月魂來映燭
恐隨春夢去飛揚風亭把盞酬孤艷雪徑回輿認暗香
不爲調羹應結子直須留此占年芳

二

結子非貪鼎鼐嘗偶先紅杏占年芳從教臘雪埋藏得
却怕春風漏洩香不御鉛華知國色祇裁雲縷想仙裝
少陵為爾牽詩興可是無心賦海棠

三

淺淺池塘短短牆年年為爾惜流芳
向人自有無言意
傾國天教抵死香
鬚裊黃金危欲墮
蒂團紅蠟巧能裝
嬋娟一種如冰雪
依倚春風笑野棠

和晚菊

不得黃花九日吹
空看野葉翠
歲蕤淵明酩酊知何處
予美蕭條向此時
委翳似甘終
草莽栽培空欲傍
藩籬
可憐蜂蝶飄零後
始有閑人把一枝

景福殿前栢

香葉由來耐歲寒，幾經真賞駐鳴鑾。
根通御水龍應蛰，枝觸宮雲鶴更盤。
怪石誤蒙三品號，老松先得大夫官。
知君勁節無榮慕，寵辱紛紛一等看。

四月果

一春強半勒花風，幾日園林幾樹紅。
汲汲追攀常恨晚，紛紛吹洗忽成空。
行看果下蒼苔地，已作人間白髮翁。
豈惜解鞍留夜飲，此身醒醉與誰同。

牆西樹

牆西高樹結陰稠
步履窮年向北留
白日屢移催我老
清風一至使人愁
紛紛暝鳥驚還合
渺渺涼蟬咽欲休
回首舊林歸未得
看看知復幾春秋

度麾嶺寄辛老

區區隨傳換冬春
夜半懸崖託此身
豈慕王尊能許國
直緣毛義欲私親
施為已壞生平學
夢想猶歸寂寞濱
風月一歌勞者事
能明吾意可無人

狄梁公陶淵明俱爲彭澤令
至今有廟在焉

刁景純作詩見示繼以一篇

嘉祐中提點江東刑獄時作

梁公壯節就夔臈陶令清身託酒徒政在房陵成底事
年稱甲子亦何須江山彭澤空遺像歲月柴桑失故區
末俗此風猶不競詩翁歎息未應無

寄沈鄱陽

時為江東提刑

離家當日尚炎風叱馭歸時九月窮朝渡藤溪霜落後
夜過麾嶺月明中山川道路良多阻風俗謠言苦未通
唯有番君人共愛流傳名譽滿江東

送裴如晦宰吳江

青髮朱顏各少年
幅巾談笑兩歡然
柴桑別後餘三徑
天祿歸來盡一廛
邂逅都門誰載酒
蕭條江縣去鳴弦
猶疑甫里英靈在
到日憑君爲艤船

次韻樂道送花

沁水名園好物華
露盤分送子雲家
新粧欲應何人面
彩筆知書幾葉花
曾和郢中歌白雪
亦陪天上飲流霞
春風已得同心賞
更擬攜詩載酒誇

籌思亭

在江東轉運
司南廳後園

昔人何計亦何思
許國憂民適此時
寓興中園爲遠趣
託名華榜有新詩
數株碧柳蒼苔地
一丈紅蕖綠水池
坐聽楚謠知歲美
想銜杯酒問花期

愁臺

頽垣斷塹有平沙
老木荒榛八九家
河勢東南吹地圯
天形西北倚城斜
傾壺語罷還登眺
岸幘詩成却嘆嗟
萬事因循今白髮
一年容易即黃花

和正叔懷其兄草堂

茆堂竹樹水之濱耕稼逍遙似子真
小吏一身今倦宦先生三畝獨安貧
欲拋縣印辭黃綬來伴山冠戴白綸
祇恐明時收士急不容家有兩閑人

鄭子憲西齋

漫搆軒窗意亦深滔滔浮俗倦登臨
詩書千載經綸志松竹四時蕭洒心
曉枕不容春夢到夜燈唯許月華侵
行看富貴酬勤苦車馬重來拾翠陰

寄題思軒

名郎此地昔徘徊天誘良孫接踵來萬屋尚歌餘澤在
一軒還向舊堂開右軍筆墨空殘沼內史文章祇廢臺
邑子從今誇勝事豈論王謝世稱才

陳君式大夫恭軒

恭軒靜對北堂深新斲檀欒一畝陰膝下往來前日事
眼中封植去年心每懷蹲笋沾餘瀝獨喜弦歌有嗣音
肯構會須門閥大世資何用滿籛金

寄黃吉甫

學兼文武在吾曹別後應看虎豹韜欲問廟堂誰鎮撫
尚傳邊塞敢驚騷旌旗急引飛黃下時發騎士南征烽火遙連
太白高聞說荆人亦憔悴家家還願獻春醪

高魏留

魏留十七助防邊埋沒鹽州十八年衣屨窮空委胡婦
糗糧辛苦待山田關河舊路頻回首腹背他時兩受鞭
邂逅得歸耶戰死母隨人去亦蕭然

丁年

丁年結客盛遊從
宛洛羶車處處逢
吟盡物華愁筆老
醉消春色愛醅濃
壚間寂寞相如病
鍛處荒涼叔夜慵
早晚青雲須自致
立談平取徹侯封

臨川文集卷二十

欽定四庫全書

臨川文集卷二十一

宋 王安石 撰

律詩

七言八句

送王詹叔利州路運判

送周仲章使君

送王蒙州

送龐簽判

送潘景純

送僧無惑歸鄱陽

送遜師歸舒州

寄育王大覺禪師

寄無爲軍張居士

次韻酬鄧子儀二首

送李璋

送章宏

別葛使君

送王龍圖守荆南

次韻酬宋中散二首

和宋太博服除還朝簡諸朋舊

次韻酬宋玘六首

寄吳正仲蒙馬行之梅聖俞和寄依韻酬之

寄平甫

次韻舍弟常州官舍應客

舟還江南阻風有懷伯兄

同陳伯通錢材翁遊山二君有詩因次元韻

夢張劔州

酬慕容負外

次韻張唐公馬上

和王司封會同年

次韻酬子玉同年

和舍弟舟上示沈道源

過山即事

酬裴如晦

酬鄭閔中

寄俞溫卿

寄郎侍郎

送道光法師住持靈巖

送王詹叔利州路運判

王孫舊讀五車書
手把山陽太守符
未駕朱轡辭輦轂
却分金節佐均輸
人才自古常難得
時論如君豈久孤

去去便有歸奏事莫嗟行路有崎嶇

送周仲章使君

看君東下雪溪船廻首紛紛已五年簪筆少留吾所望
剖符輕去此何緣高麾行路穿秦樹駿馬歸時著蜀鞭
子墨文章應滿篋承明宣室正詳延

送王蒙州

請郡東南促去程拍堤江水照紅旌仁聲已逐春風到
使節猶占夜斗行箭落早鷗鷺兔避句傳炎海鱷魚驚

麒麟不是人間物漢詔先應召賈生

送龐簽判

北都兩去不辭勤仕路論材況出羣一相開藩嘗負弩
三年通籍更從軍清談猶得當時事遺愛應從此日聞
我憶荆溪山最樂看君摩翮上青雲

送潘景純

東都曾以一當千場屋聲名十五年晚賜綠衣隨宦牒
始操丹筆事戎旃明時正欲精蒐選榮路何當力薦延

賴有史君能好士方看一鶚在秋天

送僧無惑歸鄱陽

晚扶衰憊寄人間應接紛紛祇強顏
挂席每諳東匯水採芝多夢舊遊山
故人獨往今為樂何日相隨我亦閑
歸見江東諸父老為言飛鳥會知還

送遜師歸舒州

山川相對一悲翁往事紛紛夢寐中
邂逅故人恩意在低徊今日笑言同
看吹陌上楊花滿忽憶巖前蕙帳空

亦見桐鄉諸父老為傳衰颯病春風

寄育王大覺禪師

單已安那示入禪草堂難望故依然
山今歲暮終岑寂人更天寒最靜便
隱蹟亦知甘自足憑心豈吝慰相憐
所聞不到荆門耳人老禾新又一年

寄無為軍張居士

南陽居士月城翁曾習禪那問色空卓
犖想超文字外低徊却寄語言中
真心妙道終無二末學殊方自不同

此理世間多未悟因君往往嘆西風

次韻鄧子儀二首

青溪相值各青春老去臨流輒損神事事只隨波浪去
年年空得鬢毛新論心未忍遺橫目千世還憂近逆鱗
嘉句感君邀我厚自嗟才不異常人

二

金陵邂逅府東偏手得新蒲每共編采石偶耕垂百日
青溪並釣亦三年君才有用方求祿我志無成稍問田

一笑欲論心迹事白頭相就且歌眠

送李璋

湖海聲名二十年尚隨鄉賦已華顛却歸甫里無三徑
擬傍胥山就一廛朱轂風塵休悵望青鞋雲水且留連
故人亦見如相問爲道方尋木鴈篇

送章宏

道合由來不易謀豈無和氏識荆璆一川濁水浮文鷸
千里輕帆落武丘身退豈嫌吾道進學成方悟衆人求

西風乞得東南守杖策還能訪我不

別葛使君

邑屋為儒知善政市門多粟見豐年追攀更覺相逢晚
談笑難忘欲別前客幙雅遊皆置榻令堂清坐亦鳴弦
輕舟後夜滄江北迴首春城空黯然

送王龍圖守荆南

壯志高才偃一藩更嗟賢路此時難長幡欲動何妨屈
老驥能行豈易閑沙市放船寒月白渚宮留御古苔斑

知公未厭還隨詔歸省功名重太山

次韻酬宋中散二首

初見彤庭賜履雙便參東閣寄南邦時聞正論除疑網
每讀高辭折慢幢陳迹欲尋無復日舊思思報有如江
風流今見佳公子投老心旌一片降

二

超然京洛諒難雙處在家庭譽在邦道義門中窺戶牖
風騷壇上見麾幢素書欸欸誰憐杜彩筆道道獨勝江

信美賢公有才子篤誠真復類尤降

和宋太博服除還朝簡諸朋舊

呼門初起外廷臣秀氣稜稜動搢紳
談論坐來能慰我篇章傳出亦驚人
生芻一束他年闕伐木相求此地新
便欲與君同樂處窮通餘事不關身

次韻酬宋玘六首

洗雨吹風一月春山紅漫漫綠紛紛
褰裳遠野誰從我散策空陂忽見君
青眼坐傾新歲酒白頭追誦少年文

因嗟涉世終無補久使高材雍上聞

二

東風渺渺客天涯病眼先春已見花
遠欲報君羞強聒老知隨俗厭雄誇
窮通往事真如夢得失秋毫豈更嗟
邂逅故人唯有醉醉中衣幘任欹斜

三

城中燈火照青春遠引吾方避糾紛
遊行水邊追野馬嘯歌林下應山君
愁尋徑草無求仲喜對簷花有廣文

邂逅一樽聊酩酊聲名身後豈須聞

四

遠迹荒郊謝雋豪春風誰與駐干旄故交重趼恩何厚
新句連篇韻更高美似狂醒初噉蔗快如衰病得觀濤
久知坏冶成天巧豈與人間共一陶

五

無能私願祇求田時物安能學計然鑿井未成歌擊壤
射熊猶得夢釣天遙思故國歸來日留滯新恩已去年

攜手與君遊最樂春風陂上水濺濺

六

山陂疇昔從吾親諸父先生各佩紛零落長年誰語此
遲回故地却逢君衣冠偶坐論經術槩樛當時刺繡文
更怪高材終未遇有司何日選方聞

寄吳正仲却蒙馬行之都官梅聖俞太博和
寄依韻酬之

山水玄暉去後空騷人還向此間窮小詩聊與論孤憤

大句安知辱兩雄
秦甲久愁荆劒利
趙兵今窘漢旗紅
背城不敢收餘燼
馬首翩翩只欲東

寄平甫

少時為學豈身謀
欲老低徊各自羞
乘馬從徒真擾擾
求田問舍轉悠悠
弦歌舊國平生樂
鞍馬新年幾日留
坐想摧鞭楊柳路
春風先我入皇州

次韻舍弟常州官舍應客

霜雪紛紛上鬢毛
憂時自悔目空蒿
桑麻祇欲求三畝

勢利誰能算一毫此地舊傳公子札
吾心真慕伯成高
飄然更有乘桴興萬里寒江正復艚

舟還江南阻風有懷伯兄

幾時重接汝南評兩槳留連不計程
白浪粘天無限斷
玄雲垂野少晴明平臯望望欲何向
薄宦嗟嗟空此行
會有開樽相勸日鵲鴒隨處共飛鳴

同陳伯通錢材翁遊山二君有詩因次元韻

秋來閑興每登臨因叩精藍望碧岑
強策羸驂尋水石

忽驚幽鳥下煙林同時覽物悲歡異自古忘名趣向深
安得湖山歸我手靜看雲意學無心

夢張劍州

萬里憐君蜀道歸相逢似喜語還悲江淮別業依前處
日月新阡卜幾時自說曲阿猶未穩即尋湓水去猶疑
茫然却是陳橋夢昨日春風馬上思

酬慕容員外

當為王宮教授以
武舉入宮被闕

初駕王門學者師晚漂湖海衆人悲吹毛未識腰間劍

刺股猶藏袖裏錐
衛霍功名還有命
蘇張才氣久非時
江尤亦見應須飲
莫放窮愁入兩眉

次韻張唐公馬上

揭節初悲力不任
賜身終愧謬恩臨
病來氣弱歸宜早
偷取官多責恐深
膏澤未施空謗怨
瘡痍猶在豈謳吟
黃昏信馬江城路
欲訪何人話此心

和王司封會同年

叔科天陞頃同時
回首相歡事亦稀
追講舊遊犀麈脫

交酬新唱彩牋飛直須傾倒樽中酒休惜淋浪坐上衣
日暮主翁留客轄會稽聊滯買臣歸

次韻酬子玉同年

子玉詩云過盡金湯知帝
策見求貂虎識軍儀男兒

本有四方志祇
在蓬瀛恐不知

盛德無心漠北窺蕃胡亦恐勢方羸塞垣高壘深溝地
幕府輕裘緩帶時趙將時皆思李牧楚音身自感鍾儀
慙君許我論邊鎖俎豆平生却少知

和舍弟舟上示沈道源

還裝欲盡喜舟輕更喜嘉賓伴此行野飲不忘魚可釣
旅羹何惜鴈能鳴西山壯馬先歸牧南穴殘梟欲就烹
憂國自多廊廟宰與君詩酒盡交情

過山即事

却過茲山已九年江湖身世只飄然曲城丘墓心空折
鹽步庭闌眼欲穿慘慘野雲生隴底蕭蕭飢馬立風前
轉多愁思催華髮早晚輕舟上秀川

酬裴如晦

二年羈旅越人吟
乞得東南病更侵
傷子未安莊氏義
壽親還慰魯侯心
鮮鮮細菊霜前藥
漠漠疎桐日下陰
濁酒一杯秋滿眼
可憐同意不同斟

酬鄭閔中

蕭條行路欲華顛
迴首山林尚渺然
三釜祇知爲養急
五漿非敢在人先
文章滿世吾誰慕
行義如君衆所傳
宜有至言來助我
可能空寄好詩篇

寄余溫卿

雲散風流不自禁
天涯無路盍朋簪
空馳上國青泥信
誰和南山白石音
平日離愁寬帶眼
訖春歸思滿琴心
終回一命翩翩駕
獨過稽山鍛樹陰

寄郎侍郎

兩朝人物歎賢豪
凜凜清風晚見褒
江漢但歸滄海濶
丘陵難學太山高
放懷詩酒機先息
迴首功名世自勞
久願作公樽俎客
恨無三畝斲蓬蒿

送道光法師住持靈巖

靈巖開闢自何年草木神竒鳥獸仙一路紫苔通宵篠
千崖青靄落潺湲山祇嘯聚荒禪室象衆低摧想法筵
雪足莫辭重趼往東人香火有因緣

臨川文集卷二十一